

# DALC'HOMP D'HOR FEIZ

---

VAR DON : *Sainte Religion.*

*Da feiz an tadou koz, ni potred Breiz-Izel,  
Ni zalc'ho mad ato ;  
'Vit feiz hon tadou koz, hag en dro d'he baniel  
Ni oll en em stardo.  
Feiz karet hon tadou, morse ni ho nac'ho  
Kentoc'h ni a varvo.*

D'ar c'hrouadur bihan, e kichennig e gavel,  
E lakit eur vam vad, en deiz evel en noz ;  
Er boan hag en anken, houman buan ra eur zell  
Var ar groaz santel... e zonj er baradoz.

D'ar potr, d'ar plac'h yaouank, c'hui ziskouez hent ar furnez,  
C'hui lavar en heuilla eb krena dirag den ;  
Bezit, tud yaouank Breiz, bezit epad ho puez  
Ato gwir gristenien ha morse treitourien.

D'an den koz, gwen e benn, e korn an tan azezet  
O skuill daelou a geuz var e amzer genta ;  
Varlerc'h kals a boan, c'hui lavar, Salver ar bed,  
Er baradôz e vo eürusted, evitha.

D'an den divar ar meas hag ive d'an den a vor  
C'hui a ro nerz-kalon er poaniou stourm 'outho ;  
Gouzout 'reont en env, e kavint oll dor zigor  
Ar vuez vo bet tenn ; d'an drubuil kenavo.

